



Adresa di pî Internet: www.banaarmaneasca.tk

E-mail: piceavad@cmb.ro

Parcia: banaarmaneasca@yahoogroups.com

ISSN - 1582 - 7607

Alanceashti unâ oară tu trei meshi

Anlu VIII, nr. 4 (34) 2003

Bucureshti-România

32 di padzinji - 40.000 lei



BANA

ARMÂNEASCĂ

REVISTĂ DI INFORMATSII SHI CULTURĂ A ARMÂNJLORÛ DI PISTI TUTÛ

**Festivalu Folcloric
Internatsional "BANA
ARMÂNEASCĂ" Prota
editsii**


Tu dzua di Sâmbâtâ, 27-li di Martsu 2004, tahina, la sâhatea 10, la sediulu a Sutsatâljei Culturalâ Armânească va s-tsânâ **Simpozionlu "Bana Armânească"** avândalui ca tematică: **"Identitatea a Armânjloru"**.

Cari va ta s-ljea parti la Simpozion easti pârâcâlsitû s-nâ pitreacă lucrârli pi adresa a Redactsiiljei.

Dupâ prândzu, la sâhatea 16,00, la sala ARCUB, Fundatsia "Bana Armânească", ashî cumu u fatsi cafi anû, ahurhindalui ditû anlu 1998, organizeadzâ **Gala a Premiilorû "Bana Armânească"**.

Dupâ aesta, tu idyea sa-lâ, va s-tsânâ **"Festivalu Folcloric Internatsional armânescu - prota editsii"**. Vâ ashtiptâmû cu harauâ!

Fundatsia:
"Bana Armânească"



Câlivili (Livâdzli) adzâ

Câliveancâ

"TRĂ MULTSĂ ANJI" SHI ANLU 2004 CU GHINEATSĂ!

Editoru: Dumitru Piceava

Tu aestu numiru: 4 (34), 2003

Redactsia; Livădz...(T.Piceava)...	2/3
"Dipunu Armânlji..."(T. Babali)...	4/5
Numtâ....(Kira Mantsu)	6/7
Yiurtiili armâneshtsâ tu veara 2003 (Mariana Budesh).....	8/9
Hrista Lupci (Kira Mantsu).....	10
Moscopole (Max D.Peyfuss)..	11/12
Yioryi Novaci.....	12
Mulovishti (Niculachi Caracota)....	13
Unâ carti noauâ (Mar. Bara)....	14/15
Nai ma avutslji Armânjii di România (Rev. Capital).....	16/17/18
Sutir Bletsâ.....	19
Limba armânească (Andon Kristo)..	20
Fratili a nostu...(D. Piceava).....	21
Numtâ nicuchirească.....	22
Prota gârdânitsâ...(Mar. Budesh).	23
Congreslu ali PAM	24/25
Dada Tereza, Alidzeri (Pr.S.Yeranda Andamusea di Bituli(D.Perifan)	26/27
Torna, torna, fratre, Cătră Armânji, La Valea di Iananina.....	28
Logica anvârlâ (Y. Telea)	29
Crushuva.....	30
Reclamâ, Papu Cârciuunu, Hâbari..	31

Abonamentili

s-facû la adresa a Redactsiiljei. Pâhălu a unui abonamentu ti unû anû easti: Ti yivâsitorlji di România: 190.000 di lei. Ti yivâsitorlji di tu xeani: 20 \$ SUA.

Revista poati s-hibâ yivâsitâ shi pi Internet la adresa:

www.banaarmaneasca.tk

Poshta electromnică:

E-mail: piceavad@cmb.ro

Pareia di muabeti:

banaarmaneasca@yahoo.com

ISSN - 1582-7607

Revista

"Bana Armânească"
Thimiljiusitâ tu anlu 1996 di
Dumitru PICEAVA
Editatâ di Fundatsia
"Bana Armânească"

Hărgiurli

ti tipusearea a alushtorû numiri: 4 (34), 2003 (1.000 cumâts), furâ facti di editorû shi di cătră tinjisitlu Dima Grasu, a curilji efhăristusimû ditû tutâ inima ti agiutorlu datû.

Tutûnăoarâ, Redactsia efhăristiseashti a tutulorû atsilorû tsi nă agiutarâ pânâ tora ta s-putemû sâ scutemû tru migdani aestâ revistâ sh-yini cu pârăcâlseara cătră tuts Armânlji cu vreami ti fara sh-cultura armânească s-nă agiutâ sh-di aoa shi nclo. Mash ashitsi va s-putemu sh-noi, tu aradha a noastâ, s-lji-agiutâmû Armânlji.

Redactsia:

Redactorû: Dumitru PICEAVA
Colaboratori: Marilena BARA, Mariana BARA, Mariana BUDESH, Niculachi CARACOTA, Vanghiu DZEGA, Sashu YERÂNDĂ, Jani GUSHO, Andon KRISTO, Kira IORGOVEANU - MANTSU, Aura PASHA.

Tehnoredactari computeridzatâ:
Tacu BABALI

Adresa a redactsiiljei:
Sos. PANTELIMON, nr. 258, bl. 47, sc. D, et. 6, ap. 241, cod 73559, Bucuresti. Telefon: 021/6282786 shi 0723/609266.

Contulû a Fundatsiiljei
"Bana Armânească":
2511.1 - 7280.1/ROL - BCR,
Sucursala Stefan cel Mare, 32,
sector 2, Bucureshti.



Dumitru Piceava -
 Desen di
 Mihai Pânzaru - PIM

T u t i
 pirmsili
 d i t û
 ficiureatsâ
 avdzâti di
 la pârîn-
 tsâlji sh-di
 la pâpânlji
 a melji
 suntu ligati
 di hoara di
 y i s û ,
 Livădz icâ
 C â l i v i ,
 cumu-lji si
 ma dzâtsi.

Di atseali

tsi li avea bânâtâ Cadrilaterû azbura multu ararû. Elji pîrmitusea tutû tsi sh-avea bânâtâ tu hoara Călivî. Aclo s-avea amintatâ. Aclo eara leagânlu a lorû sh-aclo, canda, tutû minduea sâ s-toarnâ vârhoarâ. Nu acâtsâ can di elji sâ s-toarnâ icâ sâ-sh veada hoara iu s-avea amintatâ. Ti mini ama, hoara Călivîli eara nu mash loclu di bana a pârîntsâlorû shi a pâpânljlorû a melji mea eara shi hoara a mea, eara loclu a meu di amintari. Di aclo mi tragû. Maca trupu-nji si amintâ tu altu locû suflitlu-nji si amintâ tu locurli aesti, a Călivilorû.

Aveamû s-u vedû hoara Călivî ma năinti tu unû cadhurû veclijû iara cu doi anji ma năinti aveamû s-calcû, ti mash doauâ sâhâts, aesti locuri mâypisiti.

Estanû agiumshu iara la Călivî. Thimisirli cu pîrmitusirli ditû ficiureatsâ iara nji-acâtsarâ mintea. Di cara trets muntili dinăoarâ tsâ alănceashti hoara cu casili a ljei anvâliti cu cirnjidz aroshi.

Unû chiro casili eara anvâliti mash cu ploaci di cheatrâ. Cumû dipunji muntili sh-agiundzâ pi loclu a Călivilorû mintea tsâ fudzi la oaminlji di unû chiro cari bâna aoatsi. Nastânga a shopatlui, ca la vârhâ 200 di meatri, eara unû chiro casa alû tati. Tora suntu adrati alti casi.

Durnjii, cumû s-putea altâ turlii, tu casa a unui Armânû cari-lû ncljeamâ tutû Piceava. Easti unû cusurinû di antreilea. Sh-adrâ casa cu ndoi anji ma năinti. Unâ casâ nu ashi di mari ama undzitâ sh-musheatâ casâ. Fratili a lui, Steryiu, di psânû chiro sh-adrâ pi alantâ dzeanâ unâ casâ ma mari.

Călivîli easti unâ hoarâ ashtirnûtâ tu unû câmpu anvârligatû di muntsâ ditû tuti pârtsâli. Ari sh-doauâ izvuri cu apă aratsi sh-curatâ. Izvurli, anăltsimea mari (1200m), shi anvârligarea a câmpului

Livădz (Călivîli) adzâ

LIVĂDZ (CÂLIVILI), HOARĂ DI YISU...

(iu s-cultivâ pătâts) di muntsâ furâ furnjiili ti cari Armânjlji di unû chiro sh-adrarâ hoarâ aoatsi. Di hoara Câlivi aveamû avdzâtâ multi pirmisi shi canâoarâ nu putui s-achicâsescu unû lucru: ti cari furnjii fu ea arșâ? Cu apuhia a alishteî vizitâ, seara, la hani aveamû s-avdu pirmislu a hoarâljei Câlivi di la unû dealithealui Câlivyeânû, Iani Pâshitâ, pri numâ. Iavea tsi nâ pirmitusi nâslu: "Tu anlu 1944, cându vrea s-fugâ Nemtsâlji di aoa, acâtsarâ hoara sh-lâ dzâsirâ a oaminjlorû ta s-fugâ din hoarâ câ va li ardâ tuti casili ta s-nu ma intrâ shi sâ s-ascundâ tu eali Andartsâlji, cu cari s-ampulisea elji. Vinirâ la 4-li di Maiû 1944, câta la sâhatea 10, shi dzâsirâ: sculats shi fudzits câtse hoara va u ardemû ta s-nu poatâ s-sheadâ Andartsâlji nuntru tu eali. Câta la sâhatea 2-3 dunjeaua fudzi...iara Nemtsâlji



arcarâ unâ "sconi" shi-lji deadirâ focû shi tutâ hoara arsi sh-mash unâ casâ armasi.

Eara vâra 790 di casi tu cari bâna vâra 5000 di inshi veara ama iarna nu armânea dicâtû vâra 10-20 inshi, atselji tsi nu avea tutiputâ mea avea duchenji, cafine, vigljitori.

S-arsirâ atumtsealui casili shi oaminjlji fudzirâ. Dupâ Nemtsâ, di cara fudzirâ oaminjlji, vinirâ Andartsâlji shi u arsirâ sh-elji hoara shi iara armasi mash unâ casâ njicâ, anvâlîtâ cu ploaci.

Tu anlu 1903, tu 15-li di Agustu, s-fâtsea 42 di numtsâ dinâoarâ (di Stâ-Mâria). Hoara s-anchisi ta s-hibâ adratâ tu anlu 1767. Protslji tsi vinirâ aoatsi furâ Armânji di Yramusti, Perivoli, Tindzifanji

sh-di Moscopoli.

Bisearica din hoarâ poartâ numa alû Ayiu Nicola, cu tuti câ nu ari iuva tu muntsâ bisearicâ cu aestâ numâ câtse ea s-bagâ la bâseritsli di ningâ amari.

Ashi easti cu Moscopoli, cari easti multu aproapea di amari, shi aestâ numâ lji-u bâgarâ Moscopoleanjlji.

Tora, Câlivilî suntu vâra 70 di casi shi cafi anû s-adarâ alti casi. Di cara Nemtsâlji u arsirâ hoara tu anlu 1944 deapoaia Armânjlji vinirâ tu anlu 1945 shi adrarâ iara casi..vâra 145 di casi adrarâ...

Tu anlu 1946, partizanjli, cari loa carni di oai di la picurarli a noshtsâ, acâtsarâ polimlu cu ascherea. Toamna, Andartsâlji alû Markos, u arsirâ iara Câlivilî. Tu anlu 1947 vini ascherea aoatsi shi tu primuvearea u arsi shi alantâ parti di hoarâ ta s-nu sheadâ partizanjli tu casi. Pânâ tu anlu 1949 nu câlcâ canâ aoatsi, deapoa, ditû 1949, acâtarâ di yinea... di ara loclu sh-bâga pătâts shi adra câlivi, ca cumû li adra picurarli. Bâga pătâts shi toamna li aduna shi fudzea ...Ashi eara pânâ tu anlu 1968 cându vini aoatsi P a p a d o p u l o s , dictatorlu. Vini aoa la

Livădz deadunû cu unû altu ma njicû di elû ta s-avinâ prici, ljepuri shi câftarâ unu cunuscutû di tu aestâ hoarâ shi atselu dzâsi câ va lu aducâ unû cari lji-ascâpâ bana di la partitizanjli, proidulû di la Livădz . Alantâ dzuâ vinirâ aoatsi pritu muntsâ, nu pri iu easti calea tora...câ nu avea câljiuri atumtsea shi câtû inshirâ aclotsi, di aynanghea, di vidzu hoara shi vidzu câlivi antribâ proidulû: cari easti aotsi..shi-lji si apândâsi câ aoatsi easti hoara Câlivi. Papadopoulos dzâsi: aidi dânnâsea, tsi hoarâ easti aesta?...nitsi Indianjlji nu shedu ashitsi, nu bâneadzâ ashitsi...

Dipusirâ aoatsi. Soacrâ-mea s-tihisi di eara sh-ea aoatsi...sh-tu atsea oarâ scutea pânea ditû cuptorû. Ea-lji dzâsi alû Papadopoulos: - Va s-mâcâmû pâni caldâ cu cashû. - Itsi vrets, dzâsi Papadopoulos. Mâcarâ aclo shi ninti s-fugâ (Papadopoulos) âlji dzâsi a njiclui: mâni tahina, va-nji dai tilifonû shi tutâ armata sâ s-scoalâ pi ciciorû, atselji tsi au mihaniili s-facâ topografiili, s-yinâ cu



buldozurli shi s-adarâ câljiuri. Shi tu trei meshi s-a d r a r â câljiuri shi ma multi casi. Pânâ tu anlu 1994 Câlivilî ashî avea armasâ di la Papadopoulos...

tora, di niscântsâ anji Armânjlji acâtsarâ di adarâ iara casi".

Aestu easti, tu psâni zboarâ, pirmislu a hoarâljei Livădz icâ Câlivi, aspusû di unû Câlivyeânû.

Sigura câ, ti aestâ hoarâ, tu cari unû chiro bâna multi njilji di Armânji, namisa di cari eara shi tutâ soia a mea, suntu ti aspuneari multu ma multi lucrî. Pirmislu a hoarâljei Livădz sh-u adutsi multu cu pirmislu a puljlui Fenix, atselû puljiû cari s-amintâ ditû cinushea a lui. Dyeafura ama namisa di aesti doauâ pirmisi easti atsa câ hoara Câlivi s-amintâ ditû



Casa anvâlîtâ cu ploaci, singura cari nu fu arșâ.

cinushea a ljei di ma multi ori. Easti unâ hoarâ, va dzâcâ, fârâ moarti. Ti atsea, tora, Armânjlji tsi s-tragû ditû locurli a Livădzlorû sh-adarâ aclo câti unâ casâ.

Mini, di cafi oarâ anda câlcai pi sâmtili locuri a Câlivilorû mi ntribai: va s-agiungu sh-io vâraoarâ s-nji-adarû unâ casâ aoatsi, la Livădz, hoara a mea di yisû?...
Tacu PICEAVA

“Dipunù Armânjlji tu arniu”

BUCURESHTI

Tu dzua di Vinjiri, 31-li di Sumedru, la sala di spectacoli ARCUB, Sutsata Culturală Armânească di Bucureshti, ashî cumû u fatsi di ndoi anji, andreapsi

Armânjlji ashtiptâmu cu mari nădii ca Dumnidzâ sâ-shi dipunâ niheamâ mutrirea shi pisupra a noastă.

La aestu spectaculû loarâ parti oaspits vinits ditù Vârârii (Ansamlblulû folcloric armânescu di Dorcova shi cunuscutlu

cântatorû
d i t ù
Gârtsii,
Steryiu
Dardaculî

Ditù
Românii
loarâ
parti
Pareia
Pilisterlu
c u
solistili

Aurelia
Caranicu,

Bletsa. Spectacolu, pârâstisîtû di Aurica Piha, membru tu Consiliulû di cumânduseari a Sutsatâljei, avu unû mari sucsesû. Fu, dupâ noi, unlu di nai ma musheatili spectacoli organizati di Armânjlji di Bucureshti.

Ca aestu spectaculû s-easâ musheatû agiutarâ ma multsâ sponsori armânji a curi lâ hâristusimû cu aestâ apuhii ti agiutorlu datû shi-lji thimisimû niheamâ ma nghiosû: Nastu Tomitsâ, Teia Sponti, Eva Bozgan, Zoe Carabash, Lifter Naum, Mitică Damcalescu, Teia Budesh, Vasili Ferfelis, Iancu Cepi, Dumitru Nachi, Marius Carniciu, Cristina Brânzaru, Stere Farmachi, Gica Chicheanu, Constantin Rudu, Mihali Tegush, Nicu Shapera, Costel Farmazon shi altsâ.

Dupâ spectaculû oaspitslji furâ câlisits la serata organizatâ di Sutsata a noastă cu aestâ apuhii la restaurantulû Inter-Macedonia. Aoatsi, deadunû cu pareia cumândusitâ di Nicu Grameni, oaspitslji cântarâ sh-giucarâ pânâ aproapea di



Armânjlji di Dorkova

shi estanû unû spectacolu cu numa “Dipunù Armânjlji tu arniu”. Cu aestu spectaculû Sutsata a noastă yiurtiseashti adetea di unû chiro cându, di Ayiu Dimitri, Armânjlji dipunea di la munti tu câmpu ti irnari cu tutiputa a lorû di oi sh-di cāpri. Tu muntsâ elji s-alina cu tutiputa di Ayiu Yioryi, tsi s-yiurtiseashti tu Apriirû. Aestâ adeti Sutsata a noastă u yiurtiseashti pritû unû spectaculû tsi poartâ numa “Esû Armânjlji nsusû tu muntî”.

Spectacolu di estanû fu dishcljisû di mini, cari, tu tesea di prezidentu a Sutsatâljei Culturală Armânească, aspushû, namisa di altili, câ aesti spectacoli tsi li ndridzemû noi di Ayiu Yioryi shi di Ayiu Dimitri nu suntu altutsiva dicâtû unû arcu pisti chiro, unâ punti di ligâturâ namisa di chirolu cându Armânjlji yiurtisea ca dealithea aesti adets shi chirolu di adzâ cându noi

Yeanula Yioryi shi Flori Costea, cântatorlji Vasili Topa shi Maria Andon (di la pareia “Boatsea a Pindului”), Gică Coadă, Nicu Grameni, pareia Shopatlu shi Toma Enache cari aspusi unâ pârâvulii di N i c o l a e Batzaria.

Anamisa di atselji vârâ 350 di spectatori armânji eara v i n i t i ufitsialitâts ditù Românii (ministrulû secretar di stat Gabriel Brânzaru shi consilier Daniel Bala di la Ministerlu di externi).

Eara vinits, namisa di altsâ shi oaspits ditù Ghirmnânii: Prof. Vasile Barba, poeta Chira Iorgoveanu Mantsu, Iani Mantsu cumû shi c u n u s c u t l u alumnâtôrû ti ndrepturli a Armânjlorû ditù Gârtsii Sutir



tahina.

Dumitru PICEAVA

P.s. 1: Easti dealithea câ Sutsata Culturală Armânească andreapsi aestu spectaculû deadunû cu alti sutsâts armâneshtsâ di Bucureshti ama nitsi cumû “deadunû” cu Sectsia armânească di la RRI, cumû aspunea tinjisita Irina Paris. P.s. 2. Easti dealithea câ tinjisita Zoe Carabash cilâstâsi ti aestu spectaculû, cumû aspuni Mariana Bara, ama a noauâ, sh-nu mash, nâ si pâru câ cilâstisirli a lei avurâ shi unû altu scupo dicâtû atselû ta s-agiutâ Sutsata Culturală Armânească.

S-vdzâmû di ghini!



CUSTANTSĂ

Vini chirolu ca adetea armânească di unù chiro - cându, după yiurtisirea a sârbătoiriljei cristină "Ayi Dimitri", Armânjlji yiurtisea dipunearea cu tutiputa tu arniu, tu câmpu va dzâcâ, ti irnari -, s-hibâ yiurtisitâ estanù shi di Armânjlji di Custantsa. Tu seara di protù Brumarù, tu sala di spectaculù "Casa a sindicatilorù" di Custantsa s-adunarâ vârà 600-700 di spectatori armânji.

Di cafi oară anda fui la unù spectaculù organizatù di Armânjlji di Custantsa vidzui sala âmplinâ icâ aproaee mplinâ di spectatori armânji. Di aoatsi s-veadi mirachea a lorù ti cânticlu sh-ti joclu armânescu. Shi di aestâ oară vinirâ ca baea di multsâ Armânji ta s-veadâ unù spectaculù datù di cântătorlji armânji di Custantsa shi ditù xeani. Di Custantsa cântarâ cunuscutlji cântători Hrista Lupci, Zoe Gică shi altsâ, cumù shi pareia "Musheata Armânâ" di Mihail Kogălniceanu, ditù cari lipseashti s-nu lji-agârshimù: gâidâgiulù Ferdu shi cântătorlji Zaharica shi George Dima.

La aestu spectaculù vini di-lji mâypsi cu boatsea sh-cu cântitsli a lui cunuscutlu cântătorù di Perivoli (Gârtsii) Steryiu Dardaculi.

Maca la spectaculu di Bucureshti, iu, la cafi cânticù cântatù di Steryiù Dardaculi giuca deadunù cu elù 2-3 feati ditù pareia "Plisterlu", la spectaculu di Custantsa giuca deadunù cu elù ntreaga parei "Musheata Armânâ". Namisa di doauâ cântitsi Steryiù Dardaculi nâ zbura di mushuteatsa a limbâljei armânească cumù shi di catandisea a cânticlu armânescu cari nu lipseashti sâ s-measticâ cu iholu a cântitslorù xeani iara tinirlji armânji s-lu shtibâ cari easti atselù dealithea iholu a nostu armânescu. Pritù câlisirea la aestu spectaculù shi a cântătorlui armânù ditù Gârtsii mushuteatsa a alushtui spectaculù criscu multu. Multsâ di spectatorlji armânji âlù cunushtea Steryiu Dardaculi mash după cântitsi iara tora puturâ di-lù cunuscurâ shi ca omù. Putemù s-aspunemù câ pisupra a spectatorlorù armânji di Bucureshti sh-di Custantsa entipusea (impresia) cari u featsi cântătorlu armânù Steryiu Dardaculi di Perivoli fu multu mari shi musheatâ. Fu unù mari lucru câ Armânjlji di România puturâ di-lù cunuscurâ

aleptulù cântătorù armânù ditù Gârtsii shi tutunâoarâ unâ mari harauâ ti Steryiu Dardaculi, ditù câti nâ spunea nâslu, câ putu di-lji cunuscu Armânjlji di România cari, după cumù bâgâ oară, după ahântù chiro di anda fudzirâ ditù locurli a lorù nica âshi tsânù limba shi isnafea a lorù.

Mushuteatsa a alushtui spectaculù di Custantsa fu datâ shi di Mariana Caciandoni-Budesh cari, atumtsea anda s-alinâ pi stenâ canda s-agârshashti di bana a ljei di cafi dzuâ shi mindueashti shi azburashti di bana a Armânjljorù ashi cumù nu poati s-azburascâ unù altu.

Pritù turlia aleaptâ sh-fârâ preaclji, după mini, di cumù pârâstiseashti (prezintă) unù spectaculù cafi oară agiundzi di-lji amintâ atselji spectatori shi-lji fatsi di bâneadzâ tuti atseali tsi li-anyiseadzâ shi li-aspuni ea la microfonù. Atumtsea anda zburâ di Sutir Bletsa, cunuscutlu alumtătorù di ndrepturli a Armânjljorù ditù Gârtsii, cari avea vinitâ sh-nâslu la aestu spectaculù, tsâ sâ pârea câ bâniedz ca dealithea tuti atseali tsi li avea traptâ Sutir tu alumta a lui ti pricunushtearea a limbâljei armânească la Armânjlji ditù Gârtsii. Mariana Caciandoni-Budesh azburâ ahâtù di musheatù sh-di emotsionantu di aestu lucru câ Sutir, sh-nu mash elù, nu putu sâ-sh tsânâ lâcrânjlji. Tu bitisita di spectaculù spectatorlji cântarâ deadunù cu cântătorlji immulù a nostu natsional "Dimândarea pârintească" iara la inshirea ditù salâ doauâ tiniri armâni ditù pareia OTAR ampârtsârâ a spectatorlorù revista Bana Armânească (mash 200 di cumâts).

Dupâ spectaculù tuts atselji tsi cântarâ



Steryiu Dardaculi shi gâidâgilu Ferdu

shi agiutarâ ti ndridzearea a spectacolului furâ câlisits di Steryiu Samara la restaurantu iu, ma largu, s-cântâ shi s-giucâ multu chiro sh-iu, cu aestâ apuhii, putumù di nâ zburâmù tuts sh-nâ cunuscumù multu ma ghini unù

cu alantu.

Lipseashti s-aspunemù câ aestu spectaculù di Custantsa fu organizatù di câtrâ Mariana Caciandoni-Budesh deadunù cu OTAR, pareia iu easti ea prezidentâ, sumù pârâcâlsearea shi dimândarea alù Steryiu Samara, vitseprezidentu a Sutsatâljei "Comunitatea armânâ".

Steryiu Samara lo aestâ apofasi, cu dauâ dzâli ma nâinti, pi calea di la Câlivi (Livâdz) – Bucureshti dicara ascultâ tu mashinâ C.D-ulu cu mâypsitili cântitsi alù Steryiu Dardaculi shi dicara avdzâ câ unù cântătorù armânù cu ahtari boatsi yini sh-ljea parti la spectaculù organizatù Bucureshti di câtrâ "Sutsata Culturalâ Armânească".

Easti musheatù tsi featsi nâslu ama, după minduearea a mea, lipseashti ca organizarea a alushtorù spectaculi, di cari Armânjlji di Custantsa, sh-nu mash elji, au ahâtâ ananghi shi mirachi, după cumù s-vidzu, sâ s-facâ cu multu chiro ma nâinti. Steryiu Samara ahurhi s-organizeadzâ ahtâri spectaculi armâneshtsâ la psânù chiro după câdearea a comunismului. Atumtsea lu agiuta fratslji Steryiù shi Yioryi Beca. Di aestâ oară, cumù sh-di alti ori, lu agiutâ multu Mariana Caciandoni-Budesh.

Ânji si pari câ agiumsimù tu chirolu cându Armânjlji di Custantsa, cumù shi atselji di Bucureshti shi ditù alanti locuri ditù România, lipseashti sâ s-organizeadzâ niheamâ ma ghini.

Vini chirolu ti ahtari lucru, tinjisite domnule Steryiu Samara. Vini chirolu s-nâ organizâmù shi s-nâ unimù tuts tinjisiti doamni shi duruts domnji armânji di Custantsa: Constantin Caracoti (atselù cari, singurù, putushi di dshcljiseshti Custantsa calea ca ficiuritslji armânji s-poatâ s-anveatsâ tu sculii carti pri limba armânească), Gugeabashia, Vasili Zelca, Wily Wisoshenschi, Mita Garofil, Sirma Granzulea (la spectaculù canda, ti unù sticù di oară, avdzamù thâmâsitili bots a fidânjljorù di la "Iholu" a tâu di unù chiro...), Magda shi Iani Stavrositu, Mihali Dushu, Constantin Grasu, Justin Tambozi shi multsâ, multsâ altsâ. Vini chirolu s-nâ unimù fortsâli (ashi cumù u featsimù niheamâ la ndridzearea a spectacolului di Custantsa) tinjisiti Armâni shi tinjisits Armânji!

Tacu BABALI

„Numtâ armânească, numtâ arhundească“

Dumânică, 2-lu di Brumaru 2003, fumù Bucureshti, pi unâ numtâ armânească: sotsljii-a noshtsâ Thede Kahl shi Maria Bara s-ancurunarâ.

Canda fu unu yisù, canda unu pir-mithu, ama, pisti-psits-mi, fu deali-hea...

Tahina nâ dusimu la nunji (Oani shi Lena Nicolae), adrâmù hlambura, u miscumù, u giucâmù, sursimù shi hirtisimù yrambolu shi-nchisimù la-nveastâ... la fumealjia Bara. Dupu-ndoauâ muabets, chirniseri shi jocuri, ishi-nveasta tu yuneauâ...

Vidzuiù unâ lacârmâ tu ocljii-alù

Thede, tsi greu putu s-u dânâsească!

Dupu tsi tricumù arădzli di la-nveastâ, anchisimù la bâsearicâ.

Dinintea a bâsearicâljei “Ayi Yioryi”

ashtipta multsâ Armânji s-veadâ noaua preaclji. Ancur-runarea s-featsi pi limba română

shi pi-armâneashti... Cându preftulù armânù loa zborlu, ducheamù ma ahândosù atsea sâmtâ harauâ! Câ, de, nu-ari zborù ma dultsi di la Dumnidzâ ca zborlu di dadâ! Thede shi Maria nâ featsirâ shi-shi featsirâ aestâ harauâ a ancurunariljei pi armâneashti – cari, nâdâimù, di-aoa shi-nclo s-hibâ unâ aradhâ la Armânjlji ditù România!



Anyrâpseari pi unâ dhoarâ

*Ancâlarù pi unù murgu calù,
Vini ayonjea Thede Kahlù,
S-u ljea-nveastâ Maria Bara,
Sâ-sh ducâ bana ca-primuveara.*

Tacu Babali

Dupu-ancurunari, unù musheatù corù armânescu s-teasi dinintea a bâsearicâljei... Hlambura albâ cu crutsi fu giucată cu pirifanji di tinjisitsljii nunji

Giumbushea s-featsi la restaurantulù armânescu “Inter-Macedonia”, andreptu cu mari mirachi tr-aestâ harauâ, iu vârâ 200 di oaspits cântarâ shi giucarâ pâna tahina.

Numta ahurhi cu musheati cântitsi di numtâ, cântati di pareia “Pilisterlu”:

“V-alasu cu ghini, vruts pârintsâ”, “Nâ lilici-aroshi”, “Naparti di-Amarea Laie”

Corlu ahurhi, s-dutsea dipli-dipli, hlambura fu giucata di tinjisitsljii nunji shi numtari. Pareia “Steauâ di vreari” cântâ tutâ noaptea shi numtariljii nu s-alâsarâ din corù... Cându apiri, nu nâ yinea s-fudzimù ta s-nu chiremù musheatlu yisù tsi lu bânâmù tutâ noaptea di numtâ.

Fuiù la multi n u m t s â armâneshtsâ, ama numta alù Thede shi-ali Marie va s-armânâ trâ multsâ di noi unâ urnechi, unâ paradiymâ... Multu chiro va sâ s-azburascâ di aestâ numtâ...

Minduiescu câ multsâ di tiniriljii tsi s-hârsirâ pi-aestâ numtâ va s-aibâ mirachi s-lja urnechi!

Tsi fu ahoryea la aestâ numtâ? Fu





nească
– lumi
cari u
cunoa-
shti shi u
t i n j i -
seashti
ahântu!

T r â
t u t â
vrearea
a lui trâmânî,
Dumidzâ

atsea câ Thede shi Maria tinjisirâ tutti adetsli di numtâ armânească shi atsea tsi nâ hârsi ma multu fu câ yranyeadzljî s-alâxirâ tu stranji armâneshtsâ... Stranji hrisusiti di Bâiasa, musheata hoară armânească di Zayori...

Yranyeadzljîi n-avea turnatâ tu unû chiro miticû, atselû safi armânescu...

Boatsea a marilui cântătoru Steryiu Dardaculi n-adusi iholu armânescu nica yiu la Armânjlîi ditû Gârtsii shi agiutâ ca aestâ numtâ s-hibâ dealihea ca unû mistiryiu anticû...

Thede giucâ armâneashti di-armsimû tuts ciudusits! Giucâ cu haraua tsi u-ari daima cându avdi cânticu armânescu, ama tora eara haraua-a lui câ Dumnidzâ-lj chindrui calea a vreariljei câtâ lumea armâ-

lj durusi atselû ma aleptulû shi ma câftatlu lucru trâmôm: uidia! Thede va



s-poatâ s-duchească atsea tsi dzâtsi cânticlu armânescu: “Cara s-vrei, lăi gione, s-trets nâ banâ bunâ/ Ansoarâ-ti, lăi gione, cu-unâ featâ armânâ!”

Fumû tutâ noaptea nînga pârintsâlji alû Thede shi lâ vidzumû shi duchimû haraua câ ficiorlu-a lorû easti anvârligheatu di unâ mari vreami: vrearea armânească!

Cându va s-hibâ pitricuti caduri di la aestâ numtâ va s-videts câ, dealihea, fu ca unu pîrmithû... Ca tu zboarâli a poetlui Gica Godi: “Numtâ armânească, numtâ arhundească Lumea s-ciudusească...”

Aryondu yrambo, arhondâ-nveastă Lumea sâ-lj hârsească!”

Tu numa a noastâ shi-a numtarilorû pitritsemû alû Thede shi-ali Marie unâ uidisitâ urari ditû unû cânticu di numtâ,

tutû di-a poetlui Gica Godi:

“F â t s e t s - v â
crutsea s-
prucupsească,
Dă, Doamne, s-
anchirdâsească.
Dă, lăi Doamne,
Dumnidzâ,
Nica mari nâfăcâ!”

Kira Mantsu



Socri mări



Armânjli
di pisti
tutù s-
hârsirâ

veara aesta (2003)
di un bairù di yiurtii.

Tu 4-6-li di Alu-
narù, tu Americhii,
s u t s a t a
"Fârshirotlu"

andreapsi a-8-a editsii a Congresului di Cultură Macedo-Român. Hâbari di la aestu congres nâ deadi George Dima: "Cu mari harauâ anchisii Brigeport la Congreslu andreptu di sutsata "Fârshirotlu". Tutâ tinjia a mea ti Aurel Ciufecu ti lucurlu tsi-lù featsi ama suntu ndoi tsi nu yinù cu minduieri chischini, yinù ma multu cu scupolu s-ancheadicâ lucurlu armânescu.

Dupâ nâ stâmânâ Uniunea a Sutsatilorù Armâneshtsâ ditù Gârtsii andreapsi tu avdzâtili hori armâneshtsâ Clisura shi Hrupishte Festivalu di Cânticù shi Giocù Armânescu –2003. Cântătorlu shi poetlu Gica Godi n-aspusi: "Cu dor ti loclu machidunescu loai calea a muntelui Pindu tsi-lù portu di daima tu suflitù sh-mi dânsâ Clisura. Tu ndauli dzâli di Festival haraua shi anvirinlu furâ deadunù; harauâ ti mushuteatsa a locurlorù, ti mushuteatsa a horilorù, aspindzurati di munti shi anvirinlu di Armânjlîi tsi andreapsirâ andamâsea ti itia câ nu para azburârâ armâneashti shi tsi praxi dâmù a tiniramiljei".

Tu ahurhita a meslui Agustu Armânjlîi s-adunarâ tu Machidunii iara tu bitisita a meslui, Constantsa, fundatsia Andrei Shaguna andreapsi a 10-a editsii a festivalui "Pârintească Dimândari" shi a simpozionului Perinitatea Vlahilor tu Balcanjlîi". Ti prota oara fu andreptu shi Congreslu "Perinitatea..." La lucrâli a congreslui oaminjlîi psânji –ndoi ditù Arbinishii, ndoi ditù Machidunii (ama nai ma sârchii), ndoi ditù Romania –shi Armânji shi Românji (shi dupâ purtatic s-pârea câ cunoscu nai ma ghini problema armânească; ashî s-hibâ?).

Ti prota oara, tu România, la unâ adunari ofitsialâ s-bagâ problema ca Armânjlîi s-hibâ pricunuscuts ca mileti ahoryea, ca minoritati etno-lingvisticâ. Bots mutati; nipistipseari,

Yiurtiili a Armânjlôrù tu veara 2003

anvirinari...la ndoi di Armânjlîi a noshtsâ, iara "yeantsarlji" românji vrea s-nâ cândâsească câ nu s-ari avdzâ vâra oarâ di limba armânească, câ ea easti unâ turlîi di grai oltenescu!? Ama vrurâ –nu vrurâ s-avdâ lipseashti s-achicâsească atselji Armânji –yeantsari câ singura cali tsi lipseashti s-u lomù tora tu anlu 2003 easti CALEA A PRICUNU-SHTEARILJEI.

Tu 13-14-li di Yzmâciunù vini



Mariana Budesh shi Zaharica

arada a Armânjlôrù ditù Vâryârii tsi andreapsirâ unâ mushatâ andamâsi Velingrad.

S-aspuni câ ma s-ai angtanù primuveara shi veara di locuri, toamna va s-adunji mulțâ BIRICHETI. Avumù icâ n-avumù angâtanù di yiurtiili a noasti, di fara shi limba armânească?

Adunâmù icâ nu

adunâmù biricheti? Apandâsli va s-hibâ turlîi, turlîi, dupâ sinferuri, dupâ ergu sh-pirifânjlîi. Ama ma

s-himù obiectivi va s-apandâsimù ca BIRICHETEA EASTI CÂTÙ S-NU N-ASTINDZEMÛ. Chirearea nu va s-yinâ ahâtù chiro câ Armânjlîi s-adunâ cu tuti câ la aproapea tuti adunârli yinù idylji oaminji. Ama ahurhirâ s-yinâ oaminjlîi cu minduieri ahoryea; tuts nâ adunâ unâ ducheari, duchearea armânească. Easti ghini c-ahurhimù di nâ aspunemù minduierli shi ducherli, LIBIR, fârâ s-nâ hibâ frixi sh-fârâ s-nâ mindumù câ va s-pâtsâmù tsiva arâu ashî cumù minduea pârintsâlji a

noshtsâ tu eta a comunizmo-lui. Di la tuti aesti andamâsi putumù s-achicâsimù unù lucru: "CÂ ARMÂNAMEA easti ca loclu tsi anvirdzashti primuveara, câ ljea di s-dishteaptâ; ma multu s-azburashti di IDENTITATI, di LIMBÂ, di MILETI. Ma s-nâ-câftâmù identitatea, s-n-aflâmù noi pi noi, dzua di mâni va s-hibâ ma avutâ sh-ma mshatâ. Ninti, lipseashti s-nâ pricunushtemù noi pi noi sh-deapoaia s-yinâ pricunushtearia di la craturli iu bânâmù. Omlu tutâ bana aleadzi –sh-omlu easti libir saleagâ tsi va. Sh-noi Armânjlîi

lipseashti s-alidzemù tsi vremù s-himù. Nu putemù s-bânâmù tu nilimbizdârî shi duplicitati tutâ bana, câftândalui, atribândalui; unâ dzuâ s-himù tsiva alanta dzuâ s-himù altu tsiva, fârâ



Pânâyirlu di Breaza

Dumnidzã, omlu a vimturlorù shi a arâdeariljei, omù pseftu, fârâ hâiri. Cari va s-bâneadzâ ashieasti lucurlu a lui; noi n-avemù andreptulù s-lu giudicãmù. Cari va s-bâneadzâ cu limba shi identitatea cu cari s-amintã eara easti unâ problemâ personalâ. Cafî unù ditù noi aleadzi. Vini oara s-alidzemù shi s-aspunemù a lumiljei tsi himù. S-nu n-alâsãmù cumâdusits tu problema armâneascâ di interesì, politica shi psefta istorii (cafî crat ari istoria a lui), s-n-alâsãmù cumândâsits mash di Ducheari.

Duchearea armâneascâ, ninti di tuti lji-adunâ Armânjli, veara aesta, S.UA., Gârtsii, Machidunii, România, Vâryârii.

Volta tsi u featsimù Mulovishte va u portu tutâ bana tu suflit ca unâ icoanâ sântâ tsi-nji da puteari shi nâdii.

”Vinirâ Armânjli ditù DIASPORA”, spusi Tachi Gaga cându nâ vidzu, “s-avemù angâtanù di nâshlji”. Avurâ angâtanù di noi idyhea cumù ai angâtanù di un ficiuricù oarfânù. Dealieha oarfânji himù noi Armânjlil ditù România. N-avemù nitsi Mulovishte, nitsi Crushova, n-avemù nitsi bisearica Ayilji Constantin shi Elena, nitsi Ayea Ana, n-avemù locurli, muntsâlji, chetsarli, izvurli, ponjli, pulji...n-avemù. Chirumù multi lucuri, ama nâ armasì duchearea. Ahurhimù di chiremù pista, averlu, andriptatea, iholu, ama lomù di amintãmù tinirlji ca Mariana Bara, Alexandru Gica, George Vrana tsi sapâ, dizgroapâ, n-aspunù, cu ducheari,



Di nastânga nandreapta: Vanghiu Dzega cu ficiorlu a lui nandreapta shi A.Piha nastânga, Mariana Caciandoni -Budesh shi ma nastânga, Mita Costa Papuli shi una di votantili a lui. Pi dzânuclji, Mita Roibu.

armâneashti sh-tsi tâxea cu lâcrinji ntr-ocljî câ tu anlu tsi va s-yinâ va s-toarnâ Mulovishte shi va s-aspunâ pi armâneshti:

”SH-MINIHIU ARMÂNÛ sh-tinjisescu fara tu cari mi amintai.

Ditù Machidunii tricumù tu Gârtsii sh-n â - d â n â s i m ù Gramaticova, hoara iu s-amintâ paplu Ferdu, gâidâgilu a pareiljei „Mushata Armânâ”. Lâcrinji, multi lârinji... sh-aflâ paplu Ferdu casa iu s-amintâ, sh-afla isihia. Ânji si-pârea câ-lù vedù paplu a meu Caciandoni tsi mi criscu cu pirituserli di pâtrida a lui sh-tsi muri angricatù di dorlu di Sear... S-adunarâ Armânjli dit hoara tsi - ntriba: „Tini eshtâ fciorlu al Hrista Purichea? E, more tsi ciudii. Tuts azburamù, tuts plândzeamù, tust arâdeamù...Nicuchirlu a haniljei cu boatsi jiloasâ spusi: „Ma s-nu vdzeats di acasa, altâ banâ va s-aveamù tora, va s-earamù ma multsâ, va s-earamù tuts deadunù; tora himù araspândits, chiruts.”

D i p u s i m ù Vodena iu n-ashtipta altsâ cusurinji...Tsi harauâ...! A g i u m s h u acasâ shi lji-aspuneamù a nicuchirlui: „nu-

arâdâtsina tsi nâ da “identitati”.

Duchimù, shi tu MACHIDUNII shi tu Românii câ lucurlu nu easti chirutù...ma multu ljea di creashti. Nu vidzui canâ oarâ pânâ tora ahântsâ Armanji la unâ andamâsi ditù Machidunii. Ânji si pârea câ a n y i s e d z ù . Cunuscui tiniri tsi nji-azburârâ

nji yini s-pistipsescu câ fui tu Gârtsii ti itia câ nu-avdzâi zbor gârtsescu. Tuts azbura shi duchearea armâneashti. Poati anyisai...ama nu fu yisu, dealieha fu - earamù tu loclu a nostu, tu PATRIDA a noasta, tu MACHIDUNIA MARI.

”Paplu Ferdu lândzâdzâ; di iu-lù shteamù imirù, shicâgi, totna cu ocljilj limpidz sh-cu sumarâslu pi budzâ di unâ oarâ s-anvirinâ sh-ahurhi s-uhteadzâ:“nji-arâu, mi doari tutù truplu ama tora potù s-morù; suflitlu nji-easti isihù”. Paplu Ferdu sh-aflâ isihia la 70 di anji.

Lipseashti s-hâristusimù a sutsatâljei EKE ti câlisearea la festival ti atsea câ duchimù ca ma s-nidzem ninti pi calea tsi u loarâ nâshi, Muluvishteanylji, va s-duchimù sh-noi, bârnulù ma tinirù, isihia, tsi paplu Ferdu u câftâ tutâ bana.

Aestâ vearâ, dupâ tuti andâmuserli, achicâsii câ ma s-vremù s-amintãmù lucuri buni, lipseashti s-himù ma tolerantsâ; câ itsi omù lipseashti s-bâneadzâ ashie cum lumariseashti, cu duchearea a lui, câ n-avemù andreptul nitsi s-giudicãmù, nitsi s-himù giudicats; câpitânjlù shi pânea a noastâ s-hibâ Z B O R L U ARMANESCU, s-nidzemù ninti cu minduita câ ghinili saleadzi di arâu; câ pânâ tu soni va s-anichisimù sh-va s-amintãmù ma s-n-alasãmù cumândusits

mash di DUCHEAREA ARMANEASCA.

Cu ducheari shi pisti s-tsânemù apreasi cândila armâneascâ, noi ditù România deadunù cu Armânjli di acasâ sh-ma s-adâpãmù loclu armânescu cu zborlu, iholu, cultura armâneascâ, aestu locù machidunescu, adâpatù nâpoi cu multsâ anji di sândzâli a pâpânjlôrù va nâ da BIRICHETI, nu câtù s-nu-n-astindzemù tsi s-nâmutãmù, s-n-ascuturãmù ditù somnulù a niducheariljei shi s-bânãmù chischinji, cu tinjiili armâneashtâ...s-himù diznou ARMANJLI CU NAMUZI idghea ca Muluvishteanylji ditù anjli 1800-1900.

Ashi s-n-agiutâ DUMNIDZA!

Mariana CACIANDONI-BUDESCH



Pânâyirlu di Samarina

HRISTA LUPCI -

Marili cântătoru Armânù - Unâ Institutsiuni armânească

Di multu chiro minuiescu s-arâdhâpsescu ndoauâ zboară trâ marili cântătoru armânù - HRISTA LUPCI ... Ma nu-nji vini până tora atsea ma uidisita metaforâ tsi, dealihea-lj si cadi: Hrista Lupci - unâ institutsiuni armânească!

Noi, Armânjlji, bânâtori asprândits tu-ahânti vâsilii, nâ virsâmù avearea, putearea, suflitlu shi cultura tu-atseali vâsilii iu Dumnidzâ nâ durusi s-bânâmù ... Nu avumù shi nu avemù institutsiuni mash a noasti: Academii, Universitati, Institutù di Folclorù, Lingvisticâ ...



Hrista Lupci shi sora a lui.

Ma, tutù Dumnidzâ nu n-alâsâ dipù schiremù shi nâ duruseashti câti vârâoarâ cu câti unù mari Armânù tsi poati aproapea s-tsânâ locu di-aesti institutsiuni tsi nu putumù s-li avemù. Trâ mini, Tache Papahagi fu unâ dealihea Academii Armânească!

Ashi cumù minuiescu mini câ Hrista Lupci tsâni dealihea locù trâ unù "Institutù di Folclorù armânescu"! Nu cunoscu altu cântătoru tsi sâ shtibâ ma multi cântitsi armâneshtsâ di Hrista Lupci. Elù easti unâ dealihea memorii yii a cânticlu armânescu!

Lu cunoscu Hrista Lupci di cându earamù featâ shi mi dutseamù la tuti numtsâli armâneshtsâ tsi s-fâtsea Bucureshti ... Earamù unâ tâbâbie di ficiori shi feati armâni tsi nu-alâsamù s-facâ numtâ fârâ noi. Tr-atsea sutsatâ ca ti ciudii tsi nâ ligâ anji di dzâli shi nâ simnâ ca unâ damcâ trâ tutâ bana, aducù aminti aoa numa a lorù: Teia Caramihai, Mita shi Mihali Ploscaru, Teia Tugearu, Nicu Dauti, I. Perifan, Iancu Bafani, Nasi, Dina shi Yioryi Pishtalu, Teja Shaguna, Sandi Schcudreanu ... shi featili: Elena shi

Sirma Caluda, Cati Budesch, Tana Tugearu ..Trâ noi, tinirilji di-atumtsea, Hrista adutsea tu bana a noastâ spiritualâ unâ mâyie noauâ, nicunuscutâ până atumtsea di noi: cânticlu armânescu.

Nu s-fâtsea numtâ fârâ boatsea shi armonica alù Hrista! Nâ purta cu cânticlu-a lui tu unâ lumi nicunuscutâ di noi, di-alargu, ancestralâ, ahândoasâ, tsi cu-agiutorlu a lui ishea ditù antunearicù shi agârsheri.

Tu-atseleu chiro, cându noi bânâmù tu marili câsâbâ iu s-pârea câ tuti suntu trâ daima agârshiti, Hrista nâ turnâ tu avlachea noastâ: atsea armâneasca.

Shi, pe-anarga-anarga, ahurhimù s-agârshimù twist-ulù shi rock-lu shi s-câftâmù corlu, gioclu armânescu ...

Lipseashti s-aspunemù câ Hrista Lupci ahurhi turnarea a Armânjljorù ditù România câtâ cânticlu, folclorlu armânescu. Dupù elù ahurhirâ sâ samintâ orhestri armâneshtsâ tsi dusirâ shi ducù cu tinjie nâinti yishtearea culturalâ armânească: folclorlu.

Ma elù fu unù di protslji (deadunù cu aushlu Câshiricâ) shi armasi până tora singurlu tsi-lj si uidiseashti tinjia s-hibâ "Institutsiuni di cânticù armânescu"!

Hrista anyie cântitsi veclj, li turnâ tu banâ cu iholu vecljiù i li-nviscu tu unù iho nâu, uidisitù shi cu câftârilji-a chirolui di adzâ. Hrista Lupci adrâ shi multi cântitsi tsi intrarâ trâ daima tu folclorlu armânescu ... Mi leagâ di Hrista Lupci ndoauâ musheati thimiseri. Unâ di eali va u-aducu aminti câ-nj adusi tu suflitù unâ mari harauâ ... La 1985, mi turnamù ditù xeani, di la Protlu Congresu Armânescu (Mannheim, Ghirmânie) shi cusurinlu Teia Caramihai vru sâ-nj facâ unâ ashtiptari trâ niagârsheri ... Shi-ashi fu: mi-ashtiptarâ tuts din casâ deadunù cu Hrista Lupci. Hrista-nj cântâ, trâ prota oarâ, cântitsli tsi li-avea adratâ cu poetlu Mihali Prefiti, pi poematli-a meali ditù

Florica Pishtalu, Ora Caramihai, Orcea Njirlu, Michea Fuduli, Iana Caramihai, Chiratsa shi Maria Caratashu,

cartea "Steauâ di dor"... Fu nai ma marea tinjie shi pricunushteari tsi s-fâtsea tr-aestâ protâ carti anyrâpsitâ di unâ poetâ armânâ. Canda nu mata eara poematli-a meali; canda eara veclji di cându easti armânamea! Tu gura alù Hrista poematli



Hrista Lupci shi Mariana Budesch

"Steaua chirutâ", "Steaua pâpânjloru", "Makidunia", "Cânticu di vreari" nu mata eara mash a meali! Canda yinea ditù unù chiro miticù shi-armânescu tsi canâ oarâ nu fu aspartu. Hrista Lupci ahurhi unâ

cali tsi nâ dusi la zârtsinj, la atsea tsi easti nai ma aproapi di suflitlu armânescu: cânticlu! Ma, atselu tsi acatsâ aestâ cali, ari trâ tutâ bana-lj shi unâ mari borgi: s-aibâ angâtanù s-nu chearâ aestâ cali, s-armânâ ndreaptâ, chischinâ, armânească.... Borgea-alù Hrista Lupci easti s-aspunâ a tinirilorù cântători armânj cumù s-tsânâ aestâ cali-ndreaptâ shi s-nu u mintească cu-atseali xeani tsi suntu multu largu di spiritlu a cânticlu armânescu.

Hrista Lupci lipseashti s-hibâ unâ autoritati moralâ a cânticlu armânescu shi tinjisitù tr-aestâ ... Tinjia va s-dzâcâ: tinirilji cântători shi orhestrili sâ-lj caftâ mintea, s-lu-ntreabâ ...Hrista va sâ shtibâ s-l-aspunâ tsi cali s-acatsâ. Aestu lucru va n-agiutâ s-chischinipsimù muzica armânească di adzâ ditù România tsi di

multi ori s-avdi ca ghiftească, anturtsească Shi tutù ma ptsânù ca armânească! Di-ndoi anji Hrista Lupci ahurhi sadunâ pi caseti adrati di elù tutâ aestâ aveari di cânticu armânescu ... Suntu dealihea yishteri tsi nâ umplu suflitlu di harauâ, ocljii di lâcârñj shi nâ da nâdia câ aestu cânticù, safi

armânescu, nu va s-hearâ canâoarâ ... Cumù nu avemù unâ Academii tsi s-lu tinjisească Hrista Lupci, voiù, tora, tu numa a multsâ Armânji, s-lu durusimù Hrista Lupci cu premilu "Nai ma marili Cântătoru Armânù"!

Easti unù premiu di tinjiseari tsi-lji lu dâmù nu tu pâradz, ma tu VREARI!

Kira IORGOVEANU-MANTSU



Max Demeter Peyfuss Mituri si legende despre Moscopole

Partea a 2-a

Toate izvoarele însă vorbesc în mod congruent despre etnicitatea aromână a populației, si istoricii seriosi din Grecia nu neagă acest fapt. Întrebarea la care trebuie să răspundem se referă însă la identitatea culturală a acestor oameni. N-avem nici izvoarele si încă criteriile necesare si nici sensorul potrivit pentru un răspuns corect, dar trebuie să luăm în considerare c o n s t i i n t a s p e c i f i c ă aromânească cu mult timp înainte de începerea propagandei politice românești în Balcani.


Una din cele mai mari colonii moscopolene din diaspora a fost cea de la Miskolc în Ungaria (originea lui Saguna), si când au reusit spre sfârșitul secolului al XVIII-lea să-si construiască o biserică proprie în stilul sârbesc baroc, au pus o inscripție deasupra intrării principale în care apare următoarea frază: “dapavnh twnek Makedoniva” blavcwn

sunadelfwvn“. În același timp, privilegiile tipărite ale comunităților balcano-ortodoxe, la Viena de pildă, disting foarte clar între greci“ si “vlahi“.

Asa cum stiti, în imperiul otoman oamenii au format grupuri si constiinte comune nu după criterii lingvistice ci după comunități religioase – milletler în turca.

SINA, a donat scolilor de la Moscopole la începutul secolului al XVIII-lea o multime de cărți în greacă si latină. Dar istoricul profesional GEORGIOS LAÏOS a demonstrat mai demult cu citatul original din sursă, că această donatie nu continea decât cinci cărți în greaca veche si modernă (termenul rwmai>kav deseori e tradus gresit ca “aromâna“ dar se referă la greaca modernă spre deosebire de ellhnikav). În plus, Papa-Sina n-are nimic de-a face cu familia austriacă a baronilor SINA DE HODOS ET KIZDIA, originară si ea de la Moscopole.

Celelalte cimelii, manuscrise vechi de pildă, la care se referă autorul greco-aromân THEOPHRASTOS GEORGIADIS, nu există decât în fantezia autorilor.



Profesorlji: Nicolae Saramandu, Matilda Caragiu/Mariotseanu shi Demeter Peyfuss

e) Asa zisa catastrofă a Moscopolei.

Când am vorbit cu câțiva ani în urmă la Salonic despre “asa zisa catastrofă a Moscopolei“, auditoriul s-a revoltat. Vroiam să spun două lucruri: Una e că nu stim exact ce s-a întâmplat la sfârșitul secolului al XVIII-lea când s-au comis primele distrugerii ale orasului. A doua se referă la faptul că lovitura de gratie a fost dată abia în primul război mondial. De cele mai multe ori, crimele sunt atribuite albanezilor si turcilor, respectiv turco-albanezilor ceea ce înseamnă în limba greacă albanezi musulmani. Se mai vorbește si de asa zisele “Orlwfikav“ (răscoalele grecilor din Peloponnes si Himara cu ocazia războiului ruso-turc din 1768/74) sau de actiunile lui TEPEDELENLI ALI PASA si tatăl lui, care sunt trasi la răspundere pentru atacul din 1788.

Dar sursa principală, fiind contemporană si locală, codexul mănăstirii Sf. Ioan Prodrom, nu vorbește decât de mportzilhve“, de mafioti locali, si de interminabilele conflicte interne care au caracterizat si alte comunități de negustori greco-ortodocsi în secolele XVIII si XIX, mentionez Smyrna, Ampelakia sau Kozani. Si flota lui ORLOV nici nu ajunsese în apele osmane când s-a întâmplat primul atac în luna mai 1769!

Cele mai multe monumente culturale, bisericile, au supraviețuit atacurilor asa zisilor turcoalbanzei până la primul război mondial. Soldati francezi si banditi albanezi au distrus ce au putut distruge (Koimesis a fost grajd, undeva s-a băgat un cuptor mare într-o biserică). Foarte frumos este un citat din literatura greacă unde se vorbește despre (actiunile) “prwtoporivai twn Austroboulgarikwvn ordwvn ek misqofovrwn Albanwvn lhtosummoritwvn“, va să zică despre hordurile austrobulgare compuse de banditi albanezi! Hoti albanezi au existat, dar nu si în soldul armatei austriece. Se spune de altfel că fa-

milia rău faimatului SALI BUTKA este și astăzi activă în mafiile albaneze.

6) Perspectivele de viitor

Noi istoricii lucrăm în dimensiunea timpului și trebuie să considerăm nu numai trecutul ci și viitorul.

Sursele materiale ale istoriei Moscopolei sunt astăzi periclitate din două direcții. Una se referă la neglijența statului albanez, care are alte probleme mult mai serioase decât ocrotirea unor biserici din secolul al XVIII-lea. Cealaltă constă în intenția bisericii ortodoxe din Albania de a renova cu orice pret și cu orice metodă clădirile existente.

Fată de aceste pericole, aplicarea unor graffiti din partea tineretului islamist este de importanță minoră.

Dacă statul albanez va fi în stare să ferească monumentele istorice din Moscopole de ignorantă și de reavointă, toată atenția noastră trebuie dirijată și spre satele din jurul orasului, la satul Shpiska de pildă, unde am găsit biserici ruinate din secolele XVII și XVIII, nedocumentate pînă azi în literatura de specialitate. Mai menționez Vithkuqi, Frashëri, Dardha, Nikolica, Boboshtica (lui Victor Eftimiu), Drenova, Opari, Grabova, Niva și Llënga – unde pînă azi există biserica mănăstirii Sf. Marina, cu picturi extraordinare care au rămas nedocumentate pentru specialiști. Acesta este valabil și pentru bisericile de lângă Fieri, unde au pictat mesteri moscopolitani, și pentru monumentele din satele azi grecești, Gramostea și Linotopi.

Max Demeter Peyfuss

Mituri și legende despre Moscopole. Observații critice asupra istoriografiei române, grecești și albaneze.

1) Prima dată am vizitat Moscopole în 1970, și pe urmă am fost acolo în 1985, 1987, 1990, și în sfârșit în 1994. Dar cunosc locul și așezarea orasului din povestile pe care le-am auzit în copilărie de la tatăl meu. Bunicul bunicii mele Đ Theodor Demeter Tirka Đ s-a născut la Moscopole cu aproape două sute și

patruzeci de ani în urmă, în 1764._

2) Moscopole a fost și este un loc cu oarecare renume. Așa se explică că în mod natural a atras în jurul lui fel și fel de mituri și legende, atât de răspândite în istoria balcanilor, unde romantismul


formează întotdeauna corolarul tradițiilor naționale și revoluționare. Pe lângă faimoasa Bibliotecă de la Moscopole, care a fost demascată ca o legendă pură încă de lingvistul german Gustav Weigand și pe urmă de istoricul grec Georgos Latos, istoria renumitei Data: Mon, 1 Sep 2003 05:05:17 -0700 (PDT)

El a fost menționat, printre altele, de Nicolae Iorga ca un susținător al scriitorului sârb Vuk Stefanovici Karadici.

²Vezi, și pentru cele ce urmează: M. D. Peyfuss: Die Druckerei von Moschopolis, 1731 - 1769. Buchdruck und Heiligenverehrung im Erzbistum Achrida. Wien ¹1989 și ²1996 (cu bibliografie).

3I. Martinianos: Symbolai eis ten historian tes Moschopoleos. Athenai 1939. Idem: He Moschopolis, 1330 - 1930. Thessalonike 1957. 4E. Kurilas-Lauriotis: He Moschopolis kai he Nea Akademeia autes. Anatyposis ek tes "Theologias", en Athenais 1934. Idem: Gregorios ho Argyrokastrites ho metaphrastes tes K. Diathekes eis to albanikon.... En Athenais 1935. 5K. Ch. Skenderes: Historia tes archaias kai sunchronu Moschopoleos. En Athenais 21928. 6Ph. Michalopoulos: Moschopolis - hai Athenai tes turkokratias 1500 - 1769. En Athenais 1941. 7Th. Georgiades: Moschopolis. Athenai 1975. 8St. M. Gkatsopoulos: Moschopolis. Ioannina 1979. 9V. Papahagi: Moscopole. Rosiorii-de-Vede 1939, este o broșurică de 16 pagini. 10 De sigur, găsim foarte multe informații prețioase despre Moscopole și moscopoleni, răspândite prin diversele lucrări care privesc istoria și cultura aromânilor, menționez de exemplu A. Hâciu: Aromânii. Focsani 1936.

11St. Adhami: Voskopoja n' shekullin e lul' zimit t' saj. Tirana 1989. Idem: Voskopoja dhe monumentet e saj. Tirana 1998. 12Dh. Falo: Tragjedia e nj' qyteti. KorË' 1998. 13A. Plasari: Fenomeni Voskopoje'. Tirana 2000.



Carti di la Yioryi Novaci

Tinjisitâ Redactsii a revistâlei "Bana Armânească",

Vâ scrii Nevaci Yioryi di Custantsa cu pâracâlșearea ta s-citits poezia cari vâ u pitrecû.

Anul tsi tricu publicaiû unû volumû di stihuri cu numa "Pit cârârli a Pindului" shi tora vrea s-voiû, pritû bunâvrearea a voastâ, s-publicû shi aestâ nouâ poezii, tsi ari titlulû "Cinushea-a pâpânjlorû"

Cu tinjii,

Nevaci Gheorghe

P.S. Voiû s-vâ pitrecû unû tomû shi a voauâ shi, ti atsea, vâ pâracâlșescu sâ-nji dats adresa a voastâ.

Apandisi:

Tinjisite domnule Yioryi Novaci, Poezia "Cinushea a pâpânjlorû" u yivâsimû, nâ lo hari di ea shi u publicâmû niheamâ ma nghiosû.

Adresa a noastâ u aflats la pag. 2 shi vâ ashtiptâmû cu harauâ s-nâ pitritsets tomul di poezii cumû shi poezii tsi nu furâ publicati.

Cu tinjii,

Redactsia

Cinushea-a pâpânjlorû

Tuti zboarâli alû papû
Di la muma câti avdzâi
Unâ nu-alâsai s-chearâ
Tu chilimi li-adunai.

Mi-alinai analtu tu munti
Pi-iu alagâ elji cathi vearâ
Alâgamû vatrâ di vatrâ
Tu cinushea tsi-alâsarâ.

Alâgamu munti di munti,
La câlivi dipunai
Aflai peaticû di tâmbari
Chindisitû cu-a nostu graiû.

Cama-n ghiosû tu râpâdinâ,
Aflai torû di cârvani
Iu trâtsea Armânjlji-a noci
Tu chirolu ditû zâmani.

MULOVISHTI, hoară cu casi di unu chiro

Cumù sh-io mi-aveamù dusâ, cu unù mesù sh-niheamâ ma ninti,

Rista Paligora (vedz Bana Armânească nr. 32/33),

livendu armânu di Mulovishte, tsi avui haraua s-lu cunoscù cându nâ dâ-nâsimù Bituli.

Cumù s-veadi tu cadurù, Mulovishte easti tu unâ turlii di

Mulovishte, nu potù s-mi dâ-nâsescu s-nu anyrâpsescu



Ficiorlji alù Pero Tsatsa

niscânti minuieri sh ducheru tsi li avuiù cându tricui pritù locuri ahântu di musheati.

Cu idyea ispeti, ti tuts atselji tsi nu au avutâ haraua s-veadâ cu oclji a lorù, pitrecu dauâ caduri tsi li luai di pi unu albumu scos di



cuvatâ tu mesi di muntili Baba, di iu Peristerlu cu pâltarea-lji albâ s-mutâ majestuosù primuveara. Neaua tsi armâni pânâ amânatù tu meslu di Ciresharù s-tucheashti pianarga pianarga, sh-pitù cāljiuri tsi mash Dumnidzâ li cunoashti, agiundzi tu tuti horli tsi suntu asprânditi tu vâljiurli deanvârliga. Mulovishte easti nai ma musheata hoară tsi u vidzumù,

ma tsi nâ tsânurâ oclji ma multu, furâ casili tsi spunù di unù chiro tricutù, cari pari câ nu va s-ma toarnâ. Casi adrati di cheatrâ, alâsati di oaminji cari au bânatâ aua hârioshi cu natura cari lâ avea datâ tutù tsi lâ lipsea. Dupâ multu chiro tsi s-pari câ hoara s-avea gulitâ sh-avea

armasâ mash cu aushi, adzâ casili

ahurhescu s-dishchidâ diznou sh-Bâsearica, tsi spuni multu ti tsi eara Mulovishte vârâoarâ, intrâ tu gailelu a Europâljei. Livendzâ Armânji anâchisirâ

sh-mutrescu adzâ s-anyeadzâ chirolu sh-mârearea tsi tricui.

Bâsearica, n-amu vidzutâ altâ ashi di mari, easti restauratâ sh-mushuteatsa a ljei nu ari uidii. Nâuntru, tsi tsâ dâ-nâseashti mutrearea



Pareia folcloricâ di Bituli

easti unu multu mushatu iconostasù sculptatù tu lemnu la 1892 di masturlu Dimitri, sh bitisitu cu 24 di icoani, unâ ma musheată ca alantâ di masturlu Sokrati Manea di

Hionades tutu la 1892.

Nandreapta sh-nastânga a portsâlorù amirâreshsâ shedu Hristolu sh Stâ Mâria. Analtu, iconostaslu ari trei crutsi cu Hristolu ancârfâsatu sh di unâ parti sh-alantâ la cathi crutsi, suntu buisiti medalioani cu muljerli mironositi; Nai ma veacljia icoanâ cari s-aflâ tu bâsearicâ easti Adurnjearea a Stâ

Mâriljei di masturlu Tarpu di Korceaua la 1818.



Feata alu Vanghiu Dzega

Niculaki Caracota

UNĂ CARTI NOAUĂ A PROF.UNIV.DR.NICOLAE SARAMANDU

Ishi Custantsa, la Editura Ex Ponto, tora tu anlu 2003, cartea "Studii aromâne shi megleno-române" a prof.univ. dr. Nicolae Saramandu.

Cartea ari 256 frândzâ shi 2 hârtsâ. Nica ditù ahurhitâ s-aspunù câ prof.



u n i v . N .
S a r a m a n d u
easti adzâ –
arada cu
doamna acad.
M a t i l d a
C a r a g i u
Mariotseanu –
nai marli
cunuscătorù
shi specialistu
a limbâljei a

noastâ: di la asprândirea geografică hoarâ cu hoarâ shi munti cu munti tu tutù Balcanlu shi aua tu Românii, la istoria culturală, la sistemlu foneticù shi morfologicù, la vocabularu shi la contactili cu limbili xeani tsi li avu shi li ari limba a noastră. Easti pricunuscutù tu lumea shtiintsifică di aua shi ditù Evropa, ca dialectologù, prezidentu a comitetlui internatsional ti "Atlaslu a Limbilorù ditù Evropa" shi ca viceprezidentu a Sutsatâljei Internatsională di Dialectologii shi Geolingvistică. Ari publicatâ cârtsâ di armânistică, di dialectologii românâ shi suti di studii shi articoli tu rivisti di specialitati di la noi shi di nafoară.

Opera a prof. N. Saramandu easti lucurlu di unâ banâ ntreagâ di câftări cu metodi dialectologitsi shi alâgări pitù locurli iu bâneadzâ Armânjlji, easti zborlu di patrudzâts di anji, di cându dipisi facultatea, la 1964 shi pânâ tora. Avu tihi s-lucreadzâ di prota cu Alexandru Rosetti – unlu di nai ma mârli istorici a limbâljei românâ, cari s-avea dusâ la Armânjlji ditù Albanii tu anjlji di anamisa di doauli mări pulemati shi avea studiatâ limba armânească. Cu metoda structuralistă di câftari fonetică shi cu metoda dialectologică di adunari a mostrilorù di limbâ, prof. Nicolae Saramandu putu s-da giuiapi ti limba armânească azburâtâ Dobrugea, tu teza di doctoratù tipusitâ la 1972 : Cercetări asupra aromânei vorbite în Dobrogea. Fonetica. Observatii asupra sistemului fonologic. Partea introductivă la carti nu fu tipusitâ atumtsea ntreagâ, shi tora

vinì oara s-u avemu tutâ tu studiulù Aromânii din Dobrogea shi graiul lor (p. 11-32), anyrâpsitù la 1969, tsi avea ishitâ tu unâ formâ shcurtatâ shi tu limba ghirmanâ tu rivista Dacoromania di Freiburg/Munchen, la 1975-1976. Tu cartea di adzâ adunâ studii dedicati a limbâljei a noastâ shi niscânti di eali suntu inediti, ashì cumu fu zborlu ma nsusù.

Aestu studiu fu ahurhitù la 1967 cu 11 ancheti di terenù, cu Chestionarlu a Năului Atlas Lingvisticù Românù, deapoa continuatù tu anjlji 1976-1979. Principiul di la cari anchisi prof. N. Saramandu fu unlu modernu tsi easti uflisitù tora tu sociologii shi sociolingvistică, tsi s-acljeamâ câftarea cu agiutorlu a memoriiljei colective. Ashì anchisi s-adunâ di la ishishi Armânjlji di Dobrugea, shi nu ditù arhivi, dati ti numirlu, asprândirea, cratili di iu eara vinits, lumăchili di cari suntu shi s-veadâ cari eara "stadiul de evolutsii a dialectului aromân". Easti di mari simasii ti noi aestu studiu, câtse memoria tsi eara nica yii tu chirolu alishteî câftări di terenù, câtse oaminjlji shtea multu ghini cari suntu grupili di



Armânji, tu tsi hori bâneadzâ, dusi unu oară cu atselu bânu.

Ti tinirlji di tora shi di ma amânatù aesti suntu njicshurati di chiro. Ashì easti bana modernâ shi ashì s-veadi cumù shi Armânjlji tricurâ di la memoria yii la atsea anyrâpsitâ. Ti atsea valoarea alushtui studiu easti fârâ aspuneari. Ti atsea lipseashti s-lu adyivâsească tuts Armânjlji ta s-cunoască unâ parti ahântâ importantâ ditù istoria a noastră ditù eta yinghits:

fuga ditù
Balcanji shi
colonizarea tu
Cadrilaterù
(1925-1938),
de-apoa yinea-
rea Dobrugea
(1940). Di aua
va s-aflâ multi:
bibliografia tu



frândzâli ditù atselù chiro (Analele Dobrogei, Peninsula Balcanică, Revista aromânească) iu anyrâpsirâ T. Hagi-Gogu, Tache Papahagi, Mihail Pineta, Cola Ciometi, Em. Bucutsa; tu unâ broshurâ (Steriu T. Hagigogu, Emigrarea aromânilor, București, 1927) i dati sumari tu niscânti cârtsâ shi studii (Capidan, Rosetti, Tache Papahagi); tu cârtsâ iu easti mutritù maxusù atselù chiro (Constantin Noe 1938, Vasile Th. Mushi 1935, Nicolae Cusă 1996); mârli grupi di Armânji, dupu numa tsi elji ishishi shi-u au datâ di totna, lucru cari easti unù argumentu ti conshtiintsă a lorù etnolingvistică shi ti ligâturli tsi daima li tsânurâ, câtse cāljiurli eara turlia a lorù di banâ ahoryea di alantu lao ditù Balcanu: Yrâmusteanji (Vârâeanj, Sârbeanji, ditù Gârtsii), Fârshirots (iu intrâ dupù clasificarea empirică armânească, shi Muscupuleanjlji shi Miuzăkearlji), Avdiljeats (ditù Gârtsii); horli di Dobrugea iu bânâ la 1968 cându prof.N.Saramandu featsi câftârli shi numirlu a lorù: 30.000 - 35.000 (p.18), di trei ori ma multsâ di câts avea vinitâ Cadrilateru 10.000 – 12.000¹; ti chirolu ditù soni, suntu adusi aminti recensă-mântulù cu 28.000-29.000 shi unâ estimari totală la 60.000-70.000 (n.25 / p.18) ti tuts Armânjlji ditù Românii; aflâmù di aua unù lucru tsi niheamâ nâ ciuduseashti: tutù s-aspunea câ fuga ditù Gârtsii fu atsea cama marea, câ aclo cându vinirâ Magirlji la 1920 s-featsi bana lai ti Armânji shi câ ti atsea itii fudzirâ. Ama di cara prof. N. Saramandu misurâ Armânjlji di Dobrugea dupu cratlu di iu avea vinitâ, ishi tu miydani altâ isapi: ditù Vârâarii fudzirâ cama multsâ, cu 31%, ică 5.000, iara ditù Gârtsii vârà 3.800. "S-gulirâ Rodopilj", aspunea profesorlu Petar Atanasov unâ oară Skopje shi ashì easti: di cara cama di 5.000 di Armânji fudzirâ ditù Vârâarii năinti di 1940 – ashì cumu aspuni isapea -, adzâ suntu di elji 5.100 tu Românii, iara tu Vârâarii armasirâ adzâ ca vârà 5.000 mash lipseashti s-aspunù aua, câ aestu studiu ari niscânti goluri tu informatzii: nu suntu

misurats shi Pruianjlji di Mihail Kogălniceanu, jud. Tulcea (autorlu dzătsi că nu ari Pruianji i Viryeianji jud. Tulcea, ama nu easti dipù ashi!), tsi suntu tora shi eara shi la 1968 cama di 30 di fumelji. Vinjirâ Doimushlar Durustoru di Poroia din Susu la 1927. Furâ mutats tu Yismâciunù 1940 prota Tariverde, iara tu inshita a anlui 1940 i tu intrata a anlui 1941 iara furâ mutats cu zorea M. Kogălniceanu di Tulcea. Niscăntsâ di elji fudzirâ dupu polimù Banatù, di iu furâ deportats cu DO tu Barăganu la 1951. Di aclo deapoa altsâ s-turnarâ Dobrugea, altsâ agumsirâ Bucureshti. Ditù aeshtsâ ditù soni eara shi pâpânjli a mei.

Lipsea s-eara misurats shi Armânjlji tsi bâna tu cāsăbadz la 1968: Custantsa (Yrâmusteanji, Viryeianji, nu mash Fârshiots, cumù easti tu studiu), MANGALIA (Viryeianji), MEDGIDIA (Yrâmusteanji), TULCEA (Pruianji).

Aestu studiu va achicăsari deadunù cu altu, ditù bitisita a cartiljei: Harta graiurilor aromâneshti meglenoromâne din Peninsula Balcanică (p. 225-242), tipusitù di doauâ ori: 1988, 2001 (shi tora cu adăvgări la bibliografii). Ari shi unâ hartâ tu anexâ, cari adutsi adăvgări la prota hartâ a armâniului adratâ di Weigand la 1894-1895 shi la alanti tsi furâ andreapti cama amânatù di Th. Capidan (1942) shi di Tache Papahagi (1963). Căftărli tu locurli armâneshtsâ lu agiutarâ prof. N. Saramandu s-aducâ cama multâ videalâ tu aestâ hartâ. Eara ghini s-avea datâ shi unâ comparatsii cu cartea alù Thede Kahl di la 1999.


Jalea mari cari u avdzâmu tu vecljili cântitsi armâneshtsâ, cari nâ aducù tu minti vecljili Gramosti, Bachitsa, jalea ditù puizia cultâ tsi s-amintâ canda cu aestu scupo, ta s-plângâ aspartili fuljei a Armânamiljei, tuti li achicăsîmù cama ghini dupù adyivăsara alushtorù studii. Dupu Th. Capidan shi Tache Papahagi, prof. N. Saramandu adutsi nai ma marea contributsii la cunushterea a istoriile shi a arăspândiriljei a Armânjljorù tu dauli eti sh-giumitati ditù soni, di cându marea alorù unitati di limbâ shi di culturâ, avigljeatâ shi agiutatâ di bana mobilâ ahurhi s-aspargâ. Tu tuti aesti studii s-veadi conceptsia a prof. N. Saramandu că limba armânească s-amparti pi veacljea axâ N-S (Weigand, Capidan, Th. Papahagi) shi că lipseashti unâ abordari pi grupuri di graiù, cu numi tsi shi li deadirâ ishishi Armânjlji. Pasaji ditù carti nâ da aestâ idei di unitati, aspusâ multu năinti di Pericle Papahagi la 1909:

‘aromânii, atât în trecut, cât și în timpul de fată, au fost și sunt amestecați, trăind laolaltă la nord, sud sau centru, aromânii din diferite ramuri, din deosebite fari, cum se zice în graiul lor’ (n.10 / p.228).

Easti unâ bunâ parti ditù carti, a doaua, di mari simasii ti armânistica di adzâ, unù bairù di recenzii publicati di la 1971 ncoa, unâ turlii di cali pitù locurli armâneshtsâ, di la studiili tipusiti tu Ghirmânii di Johannes Kramer shi Wolfgang Dahmen ditù anchetili a lorù tu Gârtsii shi Makidunii la 1976, la studiulù di sintaxâ armânească tipusitù di Gh. Carageani la 1982 tu Italii, cu unù corpusù di texti di 200.000 di zboară, la Paralele folclorice greco-române alù Tache Papahagi (deftura editsii la 1970, prota eara la 1940), tu Români. Cari ari vidzutâ shi vahi adyivăsîtâ cartea alù T. Papahagi, aflâ tu recenzii ideili principali: ‘la creatiunea poetică populară greacă au participat și aromânii, ca și albanezii’ (p.167 la NS). Calea tu lumea armânească di adzâ dutsi deapoa tu Gârtsii la gramatica ishitâ la 1990 (N. Katsanes si K. Dinas), Crushuva tu monografia alù Z. Golab la 1984 shi la gramatica armânească a prof. Iancu Ianachieschi-Vlahu la 1993, Skopje la reeditarea a studiilor prof. Bojidar Nastev adratâ di prof. P. Atanasov la 1988, tutu Skopje la pîrmithili shi pîrmituserli armâneshtsâ tipusiti shi studiat di Kleanti Liaku-Anovska la 1995, calea intrâ deapoa tu Văryârîi, iu Sufii la 1994 Toma shi Nikolai Kiurkciev ascoasirâ unù dictsionarù armânescu-văryârescu, agiundzemù shi tu Americă, Statford, iu Emil Vrabie ascoasi la 2000 unù dictsionarù englezù-armânescu tu cari intrarâ zboară multu avdzâti di la Armânji tsi bâneadzâ aclo. Easti unâ selectsii. Lipseashti Arbinushia, aclo lucurlu fudzi cama greu. Nâ ciudusimù câ lipseashti recenzia la cartea alu A. Lazaru di la 1986, eara bunâ ti unù cadurù cama ntregù ti teoriili tsi s-featsirâ ti amintarea a limbâljei shi a popului armânescu.

Nu putea s-lipsească studiulù ti sistemili di anyrăpsari armâneshtsâ, multu sinteticu (p.83-88). Suntu iara concentrati shi lipsescu maxusu dyivăsari shi studiili cari omagiază

lingvishtsâlji armânji Th. Capidan, T. Papahagi (shi DDA 1963) shi Matilda Caragiu-Marioteanu (shi DIARO, vol. I, 1997). Unu studiu tsi va adyivăsari easti atselù tsi mutreashti ligăturli lingvistici anamisa di limba armânească shi limba greacă. Prota oară Gustav Meyer la 1894 aflâ 26 zboară armâneshtsâ intrati tu limba greacă shi deapoa G. Murnu la 1901, tu teza a lui di doctoratu tsănûtâ Munchen aflâ 155 ahtări zboară, di cari 16 suntu cunuscuti iutsido tu Gârtsii, iara alanti mash tu graiurli gârtseshtsâ ditù Makidunii, Tesalii shi Ipiru. Cându H. Mihăescu u reeditâ cartea alù Murnu,



la 1977, elu aflâ că suntu 300 zboară armâneshtsâ tu limba greacă, nai ma multi di eali semnalati cama năinti di Tache Papahagi tu DDA. N. Saramandu tu recenzia la aestâ reeditari, la 1981, dupu tsi featsi unâ analizâ critică, agiunmsi la concluzia că aestu lexicu dialectalù tu limba greacă aspuni că furâ

contacte di lungu chiro shi permanenti anamisa di Grets shi di Armânji shi formulează unâ ipoteză: ‘Este posibil ca multe împrumuturi să fi fost transmise în greacă de către o populație aromânească bilingvă, ulterior grecizată’ (p.162).

Nica multi potu s-hibâ ascoasi tu miydani ti aestâ carti, cari adunâ studii ditù 1964 pânâ adzâ shi da unâ panoramâ a lucurlui shtiintsificù a prof. N. Saramandu tu armânisticâ shi nu mash (suntu shi studii di folclorù, di balcanisticâ, di limba română).

Cafi Armânù cari va u adyivăsescâ aestâ carti va anveatsâ multu ti istoria a noastrâ shi ti limba a noastrâ.

Avemù shi unâ nădii: poati prof. N. Saramandu - cari li alăgâ locurli iu bâneadzâ armânamea, tu Albanii, tu Gârtsii, tu Makidunii, Dobrugea, Bucureshti shi adunâ unâ dealihea yishteari tu arhiva a Institutlui di lingvisticâ di Bucureshti, benzi magnetici ditù anjlji ‘60 - va aibâ tu umuti s-ascoatâ shi unâ carti cu impresii di calea, cu minduieri ti armânami shi ti limbâ.

1 Aestâ cifrâ easti datâ di Capidan, Macedoromânii, 250 shi easti aprucheatâ di cama multsâ istorici shi lingvishtsâ: Mihaela Bacu, Vlasidis. Nu suntu pânâ tora aflatu documenti cari s-u certificâ.

Mariana BARA